

18.
urteurrena

ortzadar

larunbata, 2015eko apirilaren 25a. 400. zenbakia

deia.com

euskal kulturaren kolore guztiak

'ITZAL GALDUAK'

Dantza tradizio-
nala eta moder-
noa lotzen dituen
ikuskizun berria

-- 4-5. orrialdeak --



AGUXTIN ALKHAT

"Alaitasunari ez
diot abesten,
kantugintzan
iluna naiz"


-- 7. orrialdea --



Tradizioaren eta modernitatearen arteko oreka

Donostiako Gero Axular dantza taldeak Noainen eskainiko du 'Itzal galduak' ikuskizunaren hurrengo emanaldia, maiatzaren 24an

 JON ANDER URKIAGA EGIDAZU



 Gaur egun, 290 kidek osatzen dute Gero Axular dantza taldea. GERO AXULAR

ESKOLAZ kanpoko ekin-tzen abaniko zabalean beste aukera bat baino gehiago da Gero Axular dantza taldeak eskaintzen duena. Ez da mugatzen asteen birritan haurrei ezpata-dantza, jota eta arina-arina irakastera. Baina, noski, hori ere egiten du. Donostiako Axular ikastolako ikasleen gurasoek sortu zuten taldea, 2004. urtean, Gero Axularreko zuzendaria den Juan Luis Unzurrunzagaren ustez, transmisioaren jarraipenean arazo bat zegoelako. “Hau da, ikastolan bazegoen dantza talde bat, baina haurrak bost urterekin dantzan hasi eta zazpi urterekin utzi egiten zuten”. Horri eran-

tzun bat eman nahian gurasoak biltzen hasi ziren, egoera nola irauli aztertzeke, haurren eta gazteen ilusioa zein zen jakiteko, eta, ondorioz, haien jarraipena bermatzeko. “Helburua garbia zen: haurrei eman nahi genien betegarri zitzaien hura; kulturak aurrera egin dezan, haurrei eta gazteei eurek eskatzen dutena eman behar zaie”.

Eta ahalegin horrek guztiak emaitza positiboak ekarri dizkio taldeari. Izan ere, momentu honetan 290 kidek osatzen dute dantza taldea. Gaur egun, betiko fandangoa, arinarina eta edozein herritako jaietan dantzatu ohi diren beti-betiko dan-

tzak irakasten eta dantzatzeko dituzte, baina baita, horiek oinarri hartuta, koreografia landuagoak ere. Unzurrunzagak dio eraldaketa gertatu aurreko garaietan, Gero Axularren dantzaren irakurketa tradizionala baizik egiten ez zen garaietan, 30 dantzari bakarrik zebiltzala taldean, eta seguru dago emandako pausoak eragin zuzena izan duela. “Oso garbi izan behar dugu nondik gatozen eta zein den gure tradizioa, horretan ados gaude. Talde batzuek ikerketa lan hori egin behar dute, eta, lan hori ez balego eginda, guk geuk egin beharko genuke; baina, hori argi esan ondoren, uste dugu gaur egungo gazteek beste pauso bat

emateko eskatzen digutela, eta horri erantzuna eman diogu Gero Axular dantza taldetik”.

Esate baterako, aldaketetako bat musikaren alorrean gertatu da. Unzurrunzagak dio haurrak eta gazteak ez zirela motibatzen txistu bakar batekin, eta, hortaz, “musikari garrantzi handia eman behar zitzaioela”. Horregatik, bai haurrei, bai unean uneko ikuskizunari berari gaur egungo soinuen berezitasuna ematen saiatzen da taldea, eta, betiko txistu eta txirulez gainera, adibidez, flautak, gitarrak eta era guztietako perkusioak erabiltzen dituzte.

TALDE ZABALA Dantza taldearen bigarren sasoiari abiatutako haur horiek 20 urtetik gorako gazteak dira dagoeneko, eta “umetan hasi ziren haietatik erdiek baino gehiagok jarraitzen dute taldean”; beraz, taldearen egitura zabaldu egin da: egun umeen talde bat, gazteen talde bat eta nagusien talde bat barnebiltzen ditu Gero Axularrek. Gainera, atea edonorentzat irekita dagoela azpimarratu du zuzendariak, eta horren erakusle da ikastolarekin zerikusirik ez duten partaideak ere badirela dantza taldean.

Dantzarien mailari begiratuta ere, ez dute inolako eskakizunik egiten. “Ia gehienak zerotik hasten dira, eta, beraz, irakasle lana ere egiten dugu, haurrei zein nagusiei zuzenduta. Gero, gainera, horietako batzuk taldean bertan geratzen dira. Baina, era berean, maila jakin bat dutenekin hobekuntza eta teknifikazio saioak ere egiten ditugu”.

“Etxean ez bezala, kanpoan ondo sentitzen dira gazteak, egiten dutena errespetagarria dela ikusten dutelako”, dio Unzurrunzagak

DANTZATIK KOREOGRAFIARA

Martxoaren 28an aurkeztu zuen Gero Axular dantza taldeak bere azken ikuskizuna, Donostiako Viktoria Eugenia: *Itzal galduak*. Pozik agertu da Juan Luis Unzurrunzaga zuzendaria obrak izandako harrekin: “Jendetza batu zen antzokian, eta kritika onak eta baikorrak egin dizkigute; denek zoriondu gaituzte, oso pozik gaude”. Ikuskizunen



1980

URTEgrafiak



Martin Zabaleta, Everesteko tontor mitikoa zapaldu zuen lehen euskalduna. DEIA

Mendiaren urtea

Juanra Madariaga

Filologoa eta idazlea

AROTZA etorri zen etxera erreminta guztiak aldean zekartzala. Egur garbiaren usainak hartu zuen nire gela. Armairu berria egingo zidatela esan zidan amak. Handik hilabete batzuetara, nireagozteko instintuak barruko azalak garai hailetako posterrez betetzeko emozioa luzatu zidan. Argi neukan zer jarriko nuen atez bestaldeko azalean: Everest Espedizioaren afixak, eta urte hartako egunkarietako albisteak. Gomutan ditut anorak lodi laranja kolore bizikoak, izotzaren urdin gardena, aurpegi haien nekea, bizarrak, bota lodiak, eta menditzarra: Everest; handik aurrera amets bilakatuko zitzaidana.

Urte hartako hasierako hilabetetan abiatu ziren espedizio-kideak, berton lotzen ginenontzat odisea izango zenari hasiera emanez. Izenak buruan ditut oraindik: Juan Ignacio Lorente espedizio-burua zen, Angel Vallejo Rosen, Ramon Arrue, Kike De Pablo, Xabier Erro,

Ricardo Gallardo, Javier Garaioa, Emilio Hernandez, Luis Maria Saenz de Olazagoitia, Joxe Urbieta Takolo, Felipe Uriarte eta mendizaletasunean hastekotan ginontzako heroia, Martin Zabaleta, tontor mitikoa zapaldu zuen lehen euskalduna.

Albisteak urriak ziren eta zalantzak eta emozioak neurri berean uztartzen ziren gure inpazientziarekin borrokan. Harik eta maiatzaren 14an, arratsaldeko 15:30ean, Martin Zabaleta eta Pasang Temba sherpa mendirik altueneko gailurrera heldu ziren arte. Eta gauzak zer diren! Duela bi urte, Khumbu bailara zeharkatzen ari nintzela, Namche Bazar herrira heldu baino lehen dagoen Monjo etxe-multzoan, Pasang Tembaren aterpean sartu ginen te bat hartzera. Hantxe agertu ziren ikurrinak, argazkiak, eta egunkarietako albisteak sherpak berak ekarrita. Gomutan zituen han goian pasatutako ordu latz guztiak. Bakean bizi zen gizona.

“

Egun hartan, euskaldunok munduko mendirik altuenean egon ginelako albisteak lau haizetara barreiatu zen”

Datorren aste...

Joseba Aurkenerena

Diodan bezala, berriak ez ziren behar bezala heltzen, baina egun batean, euskaldunok mendirik altuenean egon ginelako albisteak lau haizetara barreiatu zen. Bozkariozko leherketa izan zen hura, eta kalera irten ginelako gogoratzen dut. Zazpi kaleetan ibili ginen oihuka, gure kirolariak goratzen eta gurtzen, eta nahiz eta politikoki urte nahasiak ziren, euskalduntasuna eta mendizaletasuna batu genituen instant batez, manifestazio txiki bat osatuz. Aste batzuk geroago gauza bera bizi genuen, garai hartako La Casilla pabilioian, mendizaleei harrera beroa eta sutua egitera joan ginenean.

Armairua desagertu zen etxetik, eta berarekin batera hedabideetako albisteak eta beste guztia. Hala ere, oraindik, Felipe Uriartek izkiriaturiko *Oscuro Cabeza Humeante* liburua eskuarte hartzen dudak bakoitzean, behinolako abentura hura akordura etortzen zait, eta mendizale hasi berria banintz bezala hasten naiz gogoratzen.